

Santiago, lan eguna Hernanin

Hernaniko Udalean oporretan ez zeuden langile guztiek egin zuten lan atzo, eta EHko ordezkari politikoak ere lanean

aritu ziren. Bestetik, hainbat dendarik ere Santiago egunean lan egitea erabaki zuten, eta ateak ireki zituzten.

Atzokoa ez zen ohiko asteartea izan Hernanin, baina ezta jaiegun arrunta ere. Santiago eguna zen, eta Euskal Herriko beste herri guztietan jaieguna izan zena Hernanin beste era batean bizi izan zen, batez ere Udalean. Izan ere, Hernaniko Udalak hiru jaiegun lan egutegitik kentzea erabaki zuen iragan abenduan, haien «iza-era espainiarragatik» eta horietako bat Santiago eguna zen (atzo). Beste biak urriaren 12a eta abenduaren 6a dira.

Gauzak horrela, oporretan ez zeuden Udaleko langile guztiek udako ordutegi arruntaren arabera egin zuten lan atzo, eta Udalarekin zerikusia duten beste erakundeetan (zaharren egoitza, kultur etxea...) ere aritu zen jendea lanean.

Normalean jaiegunetan irekitzen duten taberna, jatetxe eta abarretan lan handiko egunak izaten dira jaiegunak, eta Hernaniko udaletxean ere nahikoa lan egin zuten, lan egunetan joan ohi den jende kopurua hurbildu ez zen arren. Hala ere, zera esan zuen langile batek, telefono dei bati erantzun ondoren: «Nik egun lasaia espero nuen, baina baita zera ere!».

Bestetik, komunikabideetatik egindako dei ugari ere erantzun behar izan zieten, jaiegunen aferak polemika sortu baitu. Eta ez hedabideetan soilik. Langile batek alkateari «madrildarrak baino espainiarragoa izatea»



PABLO S. QUIZA

Goiko argazkian, Udaleko langileak lanean. Behekoan, berriz, atzo ateak irekitzea erabaki zuen dendetako bat.

leporatzen zion pertsona baten deia jaso zuen, Madril-en ere lan egiten dutelako Santiago egunean.

«Edozein egun bezala»

Mertxe Etxeberria Hernaniko alkateak atzokoa «beste edozein lan egun bezalakoa» zela adierazi zion EGUNKARIARI. «Langileek egun hauetan lan egitea erabaki zuten, eta EHko kideek ere bat egin dugu haiekin. Gure ustez nazio eraikuntzan beste urrats bat egiteko modua da», adierazi zuen, bi bileren artean izan tartetxo batean.

Etxeberriaren arabera, Ipar eta Hego Euskal Herriko biztanleek «komunean ditu-



gun ezaugarriak» bultzatzen eta Espainia eta Frantziarekiko loturak hausten hasi behar dugu. «Santiagoren kontra ez dugu ezer, usadioa baita. Baina zergatik ez dugu jai egiten Arantzazuko Ama-

ren egunean, Gipuzkoako patroia izanik?», adierazi zuen. Alkateak ez zuen baztertu aurrera begira beste jai egun batzuk proposatzea, eta Udalbiltzaren sorrera eguna aipatu zuen.

«Intsumisioa»

Hernaniko udaletxeko LABeko Antton Urdangarinek egun horietan lan egitea intsumisio izatea dela uste du. «Egutegi tradizionalari intsumisioa egitea da hau, jaiegunak inposatuta etortzen zaizkigulako; beraz, nabarmenenak ziren jaiegunak aldatzea proposatu genuen», adierazi zuen.

LABek ez du ulertzen sortutako polemika. «Proposamena onartu zenean, horren ordezkari lau opor egun hartzeko aukera eman zen, eta opor egun horiek hiru data hauetan hartu nahi zituenari ez zitzaion oztoporik jarri», azaldu zuen Urdangarinek.

Bestalde, hainbat herritan ere tankera bereko erabakiak hartu direla nabarmendu zuen. Astigarragan abenduaren 6a eta urriaren 12a kendu zituzten lan egutegitik —Santiago ez, Astigarragako patroia delako—; eta Usurbilen abenduaren 6a kendu eta Udalbiltzaren sorrera ospatzen dute —irailaren 18a.

Dendak zabalik

Hainbat dendak ere ireki zituzten ateak atzokoa, Udalak hartutako erabakiarekin bat eginez; besteak beste, Miner, Gorri, Urbieta kopiak, Andrekale, Axel, Ibañez, Arka eta Ghetto dendek lan egin zuten atzo.

Eider Goenaga

HERNANI

Lea Artibaiko 17 herritan izan da Senideen martxa

■ Itsasontziz, autoz eta bizikletaz ibili zen lekukoa

Erredakzioa / Bilbo

LEA ARTIBAIN izan zen atzo euskal presoan aldeko martxa. Guztira 15 herritan: Bermeo, Elantxobe, Ibarrangelu, Natxitua, Ea, Ispaster, Lekeitio, Mendexa, Amoroto, Giza-buruaga, Aulestia, Munitibar, Bolibar, Markina, Etxebarria, Berriatua eta Ondarroan.

Herri ugari eta lekuko aldaketa gehiago egin ziren, baina

nabarmengarriena lekukoa hainbat garraiobidetan ibili zela da. Izan ere, Bermeotik Elantxobera itsasontziz joan zen, herri batetik bestera autoz eraman zuten, Markinatik Etxebarriarako bidea bizikleta gainean eta, noski, ehun metroko tarteak oinez egiten zituen. Aipatu, besteak beste, Lekeitio EHko alkateak eraman zuela lekukoa, eta Aulestian Mikel Larrauri herriko apaizak.



IRIGO AZKONA

Bermeotik Elantxoberako bidea itsasontziz egin zuen lekukoak. Argazkiak Bermeoko EHko zinegotzi bat, Elantxobeko EHko zinegotzi bati lekukoa ematen.